



Janic Maskos ha giudi da survegnir in resun direct als Dis da litteratura a Domat. Uschiglio na survegn el betg savens resuns sin ses texts. FOTOS MAD

«Las meglras ideas hai jau ordadora cun far sport»

Gist dus premis ha Janic Maskos da Scuol survegnì a Domat als Dis da litteratura: il Premi Term Bel ed il premi dal public. Cun in pèr dis distanza ha la FMR vulì savair dal student co ch'el sa sentia uss, pertge e per tgi ch'el scriveva e tge ch'el vegnia a far cun ils raps.

OLIVIA PORTMANN-MOSCA/FMR

Cun ses 21 onns ha Janic Maskos da Scuol scrit gia insaquants texts. Bliers per sazes, ma era divers per in public, saja quai per in poetry slam u per ils Impuls dad RTR. E gist dacurt ha il student da biodiversitad e rumantsch a Turitg persvadì la giuria dals Dis da litteratura cun ses text «Cour'es quaint». En ses text descriva Janic Maskos ina situaziun dad esser unfin: in pèr sa chatta en ina chamona, durant che ordadora èsi ina malaura cun temporals e ventatschs. Dagens dentant para era da regnar ina tscherta tensiun. Entant che la giuvna sa chatta dad ina vart da la chamona e legia, sa chatta il giuvenot da l'autra vart e sa fa differents quitads e patratgs. La FMR ha vulì savair da Janic Maskos, sch'el haja gia passentà ina tala situaziun e co ch'el vegnia uschiglio sin sias ideas per scriver. Respundi ha il giuven da Scuol per telefon da video.

FMR: *Vus avais guadagnà il Premi Term Bel ed il premi dal public, quai dat ensemen ina bella summa da 4500 francs. Avais gia ina bun'idea co investir quels raps?*

Janic Maskos: Jau vegn a spargnar, fitg bravin. Respectivamain, sco student pon ins adina duvra raps per chaussas tut profanas dal mintgadi, sco da mangiar, per mes sport ed ir en sortida.

Vus scriveviss gia daditg divers sorts texts. As regurdais Vus cura ch'il gust vi dal scriver è propi daventà grond?

En scola hai jau gi tschaffen da scriver cumponiments. Lura avain nus legi poesias, e quai m'ha era plaschi fitg bain. Cun il temp hai jau survegnì gust da scriver e giugar cun ils plects e la lingua. Ed uschia hai jau cumenzà a scriver per mai, senza la finamira da publitgar, simplamain per mes plaschair.

Avais Vus in idol u in autur preferì ch'inspirescha Vus?

Jau legel fitg gugent texts rumantschs. Per exempel «La müdada» da Cla Biert. Quel hai jau quasi maglià. Ed Oscar Peer ma plascha era fitg bain. Ma igl è difficil da numnar be insatgi. Auter èsi natiralmain tar las poesias. Là ma plaschan quellas da Dumenic Andry



Ordadora survegn Janic Maskos las meglras ideas. Ed il pli gugent scriva el da chaussas ch'el ha gia passentà. Da scriver in'istorgia tut fictiva fiss per el plitost ina manzegna.

fitg bain. Ma natiralmain datti er auters auturs che na scrivan betg be rumantsch, sco per exempel Arno Camenisch. Tar el chat jau interessant ch'el dovra la lingua sco element dal raquint.

Vus avais il bab che vegn oriundamain da la Germania. N'avais Vus anc mai gi gust da scriver per tudestg?

Jau hai era gia scrit per tudestg, ma betg en quel rom sco per rumantsch. Era sche jau sun creschì si cun tuttas duas linguas, ma plascha il rumantsch simplamain meglier. Igl è sco ina colur preferida.

Vus essas era creativ cun differents genres da texts: poesias, poetry slam ed ils Impuls per RTR, per numnar be in pèr. Nua chattais Vus las ideas per Voss texts?

Las meglras ideas hai jau ordadora cun far sport. Sche jau vom a curren u cun il velo, vegn jau en in ritmus e lura cumenzan ils patratgs a girar. Il ritmus gida lura era gist per la lingua e las frusas. E mintgatant sun jau usche scort che jau ferm e notesch l'idea u la frasa centrala sin il telefonin. E quella suletta frasa po alura esser l'inspiraziun per in nov text. Ma per mai è il pli impurtant dad esser ordadora. Dadens na survegn jau naginas ideas.

Avais Vus lura era gist il public davant egl, cura che Vus scriveviss insatge?

Las poesias scriv jau per mai. Ma i dat natiralmain era texts che jau scriv quasi sin dumonda, sco per exempel il text per il Premi Term Bel. Là savev'jau quant che jau dastg scriver, ma il tema era liber.

En Voss text vai per ina situaziun dad esser stufen ina chamona. È quella idea vegnida durant che Vus eras gist en ina chamona?

Jau scriv be sur da sentiments che jau hai passentà. Jau na vegn betg da scriver sur dad ina chaussa che na ma pertutga betg u che n'è betg mes sentiment. Il purtret che jau descriv sco tal na sto betg esser vair, ma il sentiment ch'el sveglia però schon.

Lain gist restar tar quest text «Cour'es quaint», ch'è tranter auter vegnì taxà als Dis da litteratura sco ina crisa da relaziun. Era quai Voss'intenziun da svegliar quel maletg?

Gea, il resun da la giuria m'ha plaschi fitg bain. Ella ha menziunà las chaussas che jau hai integrà aposta e ch'ins ha badà, ma da l'autra vart ha ella agiuntà chaussas che jau n'aveva gnanc realisà cun scriver. In exempel è il pèr en crisa. Quai n'era betg la situaziun principala che jau vuleva transportar. I n'è betg uschia che quellas duas persunas sa dessan gist giu per il nas, igl era plitost ina crisa cun la situaziun, cun questa malaura e las circumstanzas en la chamona. Ma tuttina eri fitg interessant da retschaiver in resun direct, uschiglio na survegn jau betg savens in resun sin mes texts.

Cun quest resun che Vus avais survegnì cun il Premi Term Bel tutgais Vus uss era tar las «stailas al firmament» da la litteratura rumantscha. Metta quai Vus in zic sut squitsch?

En tge direziun ch'i vegn ad ir, quai na sa jau anc betg. Cun quai che mes rom principal da studi è la biodiversitad, ma poss jau imaginar da lavurar in temp sin quel champ. Da l'autra vart fiss magister al gimnasi in'opziun, nua che jau pudess cumbinar omadus roms. Il scriver duess en mintga cas restar ina part da mai, però ina che fa plaschair. Quai duess apunta restar insatge senza squitsch.

GRISCHUN

Arrestà quatter dealers



Confiscà tranter la fin avust e la fin d'october a Domat, Favugn, Panaduz e Maiavilla: satgets cun drogas e paracetamol. FOTO POLIZIA CHANTUNALA DAL GRISCHUN

La Polizia chantunala dal Grischun ha arrestà quatter dealers da drogas. Sco ch'ella ha communitgà glindesdi, sajan ils umens vegnids arrestads tranter la fin d'avust e la fin d'october en il cuntorn da Cuira en quatter differents lieus: a Domat, Favugn, Panaduz e Maiavilla.

Las persunas arrestadas – en in'acziun coordinada cun la procura publica – sajan tuttas oriundas da l'Albania. Dus dals quatter dealers en la vegliadetgna da 19 fin 39 onns sajan gia vegnids expulsads, ha fatg a savair la polizia en sia comunicaziun.

La Polizia chantunala ha confiscà tar ils quatter dealers da drogas passa 700 grams heroin e radund 300 grams cocain d'ina valur da passa 50'000 francs. En pli cunteneva il pachet da drogas anc paracetamol (per stender las drogas) e passa 7760 francs. (rtr/sda/fmr)

CUIRA

La chapitala sa prepara per ina festuna en dus onns

La stad 2026 ha lieu en la chapitala grischuna la pli ronda occurrenza da sport da l'onn, la 59avla Festa da tir federala. Il comité d'organisaziun ha preschentà glindesdi a Cuira las preparativas.

CDM/FMR

Durant in mais, dals 5 da zercladur fin ils 5 da fanadur 2026, vegnan spetgads en la chapitala radund 36'000 tiradurs e tiradoras e 100'000 visitadras e visitaders a la 59avla Festa da tir federala. Sco quai ch'il comité d'organisaziun ha infurmà glindesdi en ina conferenza da medias, stat l'occurrenza sut il motto «Tradiziun e passiuun».



Els dus sa legran per la Festa da tir federala 2026: Chiara Leone, la victura olimpica cun l'arma da 50 meters e Martin Candinas, il president dal comité d'organisaziun. FOTO GION NUTEGN STGIER

Il center è la nova halla

Sajettà vegn tar la festa sin il Rossboden a Cuira e sin implants da tir en la vischinanza. Il center da la festa vegn ad esser sin la Obere Au en la nova halla d'events, la quala vegn construida ils proxims mais. En occasiun da la conferenza ha Martin Candinas, il president dal comité d'organisaziun e cusseglier nazional, ditg che questa festa sportiva stettia tenor el exemplaricmain «per la coesiun da la Svizra sur tut las regiuns dal pajais».

La 59avla Festa da tir federala ha in budget da radund 14 milliuns francs. Var 8 milliuns da quels custs vegnan cuvrìds, sche participants e participantas pajan lur stetgs. Ils ulteriurs custs vegnan generads sur sponsurs e partenaris.

En occasiun da la conferenza da medias ha era la victura olimpica da Paris, Chiara Leone, mess en vista sia participaziun a la Festa da tir federala dal 2026 a Cuira.

Detagls ed infurmaziuns davart la 59avla Festa da tir federala èn da chattar sin la pagina d'internet: www.gr2026.ch.